

## ■ TRIBUNA POLITICA

# Dapli biodiversitad fa bain a tuts

DA SILVA SEMADENI,  
CUSSEGLIERA NAZIUNALA PSGR

L'Uffizi federal d'agricultura (UFAG) ha infurmà dacurt davart l'empirim onn da la nova politica agrara 2014-2017. Las emprimas valitaziuns mus-san – cun paucas excepziuns – in trend positiv. Ils pajaments directs vegnan impundids uss pli sistematicamain per prestaziuns concretas. Leграivel è era che dapli purarias producechan pli ecologicamain. E la cumpart dal terren per promover la biodiversitad s'è augmentada. Particularmain manaschis da muntogna han reagì spert sin las novas cundiziuns. Numerus purs vegnan remunerads oz meglier per lur prestaziuns da tgira da spundas taissas. Era las contribuziuns per la qualitad da la cuntrada sa laschan vesair. Uschia vegnan indemnisads meglier o da nov era elements da structura en il terren cultivà, la varietad en la prada o elements tradiziunals en la cuntrada cultivada sco guauds da chastagners, blais o la cultivaziun dad ers alpins.

Ma uss chaschuna il success da la nova politica agrara quitads a l'UFAG. Suentar mo in onn vul l'uffizi numnada-



main puspè revocar quest modest progress ecologic da la nova politica agrara. Ils pajaments directs per il terren per promover la biodiversitad duain vegnir scursanids fin a 30% e las surfatschas da quest terren duain vegnir limitadas sin 50% da l'entir manaschi puril. E tut quai sche bain che las contribuziuns per la biodiversitad e la qualitad da la cuntrada importan tar tut il pajaments directs mo 15%!

Ina tala vieuta dal UFAG cuntrafa a la buna fai. Correcturas da las ordinaziuns vertentas èn mo vardavlas sche las experientschas cun il sistem da pajaments directs èn vegnidadas examinadas cumplexsivamain. Per ina bilantscha ins sto far però l'experientscha dapli che mo durant in onn. I dat dentant era secturs nua che la refurma agrara promova svilups nungavischads sco tar l'aboliziun mancada per limits

d'entradas e da facultad tar ils pajaments directs. Uschia i dat purarias che survegnan pli che 70'000 francs, intginas schizunt pli che 150'000 francs per mintga lavurant. Qua èn correcturas inditgadas. Uschiglio igl è dentant necessari da porscher per ils proxims onns ina segirtad da planisaziun fin tar la revisiun da la lescha suandanta per la perioda suenter l'onn 2021.

La proposta da l'UFAG per limitar il terren per promover la biodiversitad n'è absolutamain betg chapibla. Il parlament federal vuleva rinforzar sapientivamain cun la nova politica agrara l'agricultura da muntogna e la biodiversitad en il terren cultivà. Sche las intenziuns da l'UFAG vegnissan introducidas, stuessan registrar ils manaschis agriculs grondas perditas d'entradas – ma cunter quai ma dost jau ensem cun auters representants da las regions da muntogna. Questa politica instabla da l'UFAG fa vegnir malsegìr tut ils acturs, da quai ins sto mo scurlattar il chau. D'atun vegn a decider il cussegl federal definitivamain e jau spersesch era raschunaivlamain – per purs che cultiveschan ecologicamain e per la biodiversitad smanatschada.